

Doegsaenq Hawj Daxboh

给父亲念信

□ Baz Yin/八云

Ngeihcib bi gaxgonq, daegnuengx daj swhfan hagdangz bizyez le, de couh angqvauvau bae Lungzdung Siujyoz bauqdaengz, de nyinhnaeuz dwg giz deihfueg ndei ndeu. Hoeng gvaq song ngoenz de couh dauqma lo, duixdwdwd youq ndaw ranz. Gou cam de hauilai baez, daegnuengx cij mbot ok coenz vah ndeu naeuz: Dieg haenx mbouj baenz vunz youq!

Ngoenz ndeu, daegnuengx youh bae hagdangz lo, dwg daxboh dawz faexbien gyaep de deuz song leix gyaep. Daxboh itcig ndaq: “Baenzlawz dieg haenx mbouj baenz vunz youq? Cijaeu miz vunz youq, mwngz couh youq ndaej, duzdoq lwg mwngz, danghnaeuz caiq seizbient buet dauqma, gou yaek dub raek ga mwngz bae!”

Yienghneix, gou couh mbouj ciengzseiz raen daegnuengx, dan gek duenh seizgan ndeu sou ndaej gij saenq daegnuengx. Daegnuengx youq ndaw saenq naeuz: “Giz deihfueg neix lienz duzdoq cungj mbouj ok haex, mbouj miz dien, mbouj miz raemx, danghnaeuz ingj denyingj bingcaeg haeu mbanj daeuj, gizneix cei habngamj.” Daxboh dingq gou doeg saenq, hw sing ndeu naeuz: “Cungj dwg ma okroet!”

Doeklaeng, daegnuengx youh fak saenq daeuj lo, ndaw saenq naeuz: Gou ciengzseiz ndaej gwn noh gyoengq beixnuengx soengq daeuj, gij noh hoengzhau hoengzhau, aenvih gij lwngyez gyoengqde rox nyinh saw lo. Cungj noh haenx gig ndeigwn, gou gwn ndaej gig lai. Doeklaeng, cij rox haenx dwg nohnou, nohngwz, gou rueg yaek dai. Gou doeg saenq liux

riuriu, daxboh dauqfanj najhawq naeuz: “Gij noh haenx gou hix gwn gvaq, feihdauh gig ndei!” Gou cam bi lawz gwn, daxboh naeuz dwg sam bi caivueng seizgeiz.

Caiq doeklaeng, gou sou ndaej aen bauhgoj ndeu, hai le baez yawj, neix dwg geu buhmbangjmbaek naengsiu ndeu, daxboh lumhlumh, hwk naeuz: “Dwg naeng duz nouhenj, neix gig dijbauj!” Daegnuengx youq ndaw saenq sij le geij coenz vah: “Neix dwg vunzmbanj soengq hawj gou, gou siengj daengz daxboh gaenq geq lo, couh cienj soengq hawj daxboh ba!” Daxboh mo liux youh mo geu buh, naeuz: “Geiq baema!” Gou dawz bitceij okdaeu, naeuz: “Sij fung saenq hawj de ba!” Daxboh maeuq youq bakdou amqhunghung cit ien, amq dem amq, daengz byonghhwnz, daxboh cij nguhnyednyed ok coenz ndeu naeuz: “Gaej luenh niemh ndaw-ranz!”

Geu buhmbangjmbaek naengsiu haenx, daegnuengx doeklaeng gai lo, gai ndaej cienz bae cawx faenjbit, gyaugi daengj doenghyiengh. Ndaw saenq lij naeuz: Mwh mboujmiz faenjbit, couh aeu baengzuet yub raemx, sij youq gwnz hwzbanj, raemx baez hawq, aen saw couh siusaet lo, neix dauqfanj daezsang le gij suzdu gyoengq lwngyez rox saw, youq daengx yangh doxdax, aen hagdangz gou ndaej mingz daih’it! Daegnuengx geiq dauq mbaw ciengj he, daxboh cix yawj le youh yawj, naeuz: “Diep ndei, gizlawz yienhda diep gizlawz!”

Gij saeh daegnuengx naeuz mboujmiz faenjbit, hawj gou doeksaet,

gou guhcaeg sij saenq bae cam. Daegnuengx hoiz saenq naeuz: “Bouh denyingj 《Mbouj Ndae Noix Saek Boux》youz Cangh Yimouz daujyenj mwngz yawj gvaq ba? Ndaw ban Vunz Siujvei lauxsae miz boux hagseng ndeu buet bae dajgoeng, de bae ra, mboujdan ra ndaej hagseng le, lij ra dauq ci doxgaiq hagsib yungh ndeu. Gou ne? Hagseng gou siengj noix boux ndeu cungj noix mbouj ndaej! Aenvih, gyoengq beixnuengx ndawmbanj couhsuenq baeg dai iek, hix mbouj nyienh hawj gyoengq lwg mbouj hag!”

Gvaqlaeng daegnuengx sij saenq dauqranz, de cungj noix gangj gij saehcingz bonjfaenh, naeuz gij hagseng de couh ciemhciemh lai hwnj-daeuj, cienzbouh dwg gij coh hagseng de byawz baiz youq doekgonq lo, byawz gauj ndaej gig ndei, byawz bae ndaw yangh, ndaw si doxdax ndaej ciengj lo, daengjdaengj. Gou sing sang doeg saenq, daxboh youq henz dingq couh itcig ngaek gyaep. Gou doeg saenq caez lo, daxboh lij ngaek gyaep: “Mbouj dwg vunzbou, mbouj dwg vunzbou ha……”

Gou sikhaek fak saenq bae hawj daegnuengx naeuz daxboh haenh de, daegnuengx gvaqlaeng hoiz naeuz, de daej lo.

Gvaq cieng seiz, daegnuengx mbouj dauq. Daxboh dawz daeng-loengz youq gyaep mbanj ndwn caj daegnuengx daengz byonghhwnz, daegnuengx lij caengz dauqma.

Ndwencieng caengz gvaq liux, daxboh couh dingj mbouj ndaej lo, de

lumj bae roemx geuq nei, ndang raek rim doxgaiq hwnjdin bae ra lwg iq de lo.

Daxboh gvaqlaeng daej dauqma. Daxboh raemxda roengzyagyag yawj gou naeuz: “Mwngz rox lwi? Daegnuengx mwngz mbouj dauqma, dwg sij mbouj ndaej yungh geij cib maenz feici, mwngz rox lwi?” Daxboh naeuz de youq ndaw bya baenqcieng ra daegnuengx, gig mbouj yungzheih bungz deng boux vunz ndeu, daxboh byaij hwnjbae cam: Beixnuengx, cam baez roen ndeu……Boux haenx baez nyex gyaep: “Aeya—dwg daxboh!”

Seizneix, daxboh itcig nyapheiq cienq baebae dauqdauq. Gou cam: “Baenzlawz la?”

Daxboh naeuz: “Dieg haenx mbouj baenz dieg vunz youq o!”

Daxboh naeuz gou hoizsaenq hawj daegnuengx, heuh daegnuengx dauqma, ndaw saenq naeuz: “Mwngz mbouj yungh son saw lo, dauq gaen daxboh youq ndaw bungz hung ndaem gij byaek fanj geiqciet, ra cienz ndaej lai gvaq!”

Daegnuengx gig vaiq hoizsaenq lo, naeuz: “Gou gietdingh lo, mbouj dauqbae!” Daegnuengx lij youq ndaw saenq naeuz: “Seizcin daeuj lo, hauilai va cungj hai lo, gyoengq hagseng hwnj bya bae aeu va, mbouj dwg rag goeng, cix dwg lien rag namh vat dauq, ndaem youq rog gyausiz, miz hauilai rwi doq daeuj aeu va, gig gyaep-ndei……”

Daxboh dingq gou doeg saenq liux, raemxda lae’byoegbyoeg.

Aencingz Lauxboh Lwg Gaej Lumz

父亲恩情儿难忘

□ Vangz Fungmingz/黄凤明

Lij iq lauxboh gou sinhoj,
Ngoenz goq bin bya faeg fwnz gai;
Aemq ndaundeiq bae dauq dak raiz,
Lauxboh gai fwnz ciengx gyaranz.

Gai fwnz hawj gou bae doeg saw,
Gai fwnz hawj gou cawx buh daenj;
Caek hanh mehdin bouxlauz raen,
Lauxboh aencingz lwg gaej lumz.

Boh gou bwz laep bae Gujsanh,
Gyu nyanh naekgez rap hwnj geuq;
Bueng vunz guhdoi hanz domxneuz,
Baedauq neuznenh ranz ngamq rongh.

Nanznaih hwnj haw bae gai cawx,
Cietheiq cawx ndaej noh rangh ndok;
Lwg gwn noh le boh henx ndok,
Ndomq ok sim boh ndangq lumj rin.

Boh gou gyangngoenz guh suiqli,
Yietnaiq saekyaep lij doq daengq;
Soek faex dauq ranz doq congzaengq,
Dozcienz ma ciengx daengx gyaranz.

Byasang ndoilingq roen byaij hoj,
Miz bya moj hoengq mbwn mbouj bingz;
Ganbu ginzung haenqrengz dingj,
Raemxmoq yinx daeuj sawsiengqsiengq.

Lajmbanj lengj dwk raemxdah saw,
Raemxmoq sawsiengq diemz youh van;
Neix dwg aencingz gungcanjdangj,
Gaijsan(gaijndei) minzswng hawj duet-gungz.

Seizneix miz gwn youh miz daenj,
Hojsik boh gou dawz bak caeux;
Yaek bae hauqswnh ndwi dieg naeuz,
Boh raeuz aencingz lwg gaej lumz.



Lwghaemz baenz sou vunzlai ndawsim diemzsubsub.

Veiz Yaujbingz ingj